



Bersama  
Prof Dr Taufiq  
Yap Yun Hin

Pernahkah anda terfikir, siapakah manusia pertama diciptakan?

Apakah manusia pertama ini mempunyai ibu bapa dan bagaimana dia diciptakan?

Namun, jika dia ada ibu bapa, sudah tentu dia bukan manusia pertama. Jika tiada ibu bapa pula, bagaimana dia terjadi?

Dia tidak terjadi dengan sendiri dan jika begitu tentulah dia diciptakan.

Siapa menciptakannya? Sudah semestinya wujud suatu kuasa yang jauh lebih besar dan agung sehingga mampu mencipta

manusia yang memiliki kehebatan tersendiri.

Charles Darwin dalam bukunya *On the Origin of Species* yang diterbitkan pada 1859, mengemukakan dua teori asas mengenai evolusi manusia:

- Spesies yang hidup pada hari ini berasal daripada spesies yang hidup pada zaman silam.

- Evolusi berlaku melalui pemilihan semula jadi (natural selection).

Menurutnya, setiap spesies hidupan berasal daripada induk sama dan akan menjalani proses evolusi kepada beberapa

spesies baru melalui proses adaptasi kepada persekitaran.

Proses evolusi ini mengambil masa sehingga jutaan tahun.

Bersandarkan teori evolusi inilah, Darwin menyatakan manusia pada hari ini adalah hasil proses evolusi daripada seekor monyet.

Persoalannya, jika manusia ini berasal daripada monyet, manakah bukti menunjukkan adanya spesies pertengahan antara monyet dan manusia?

Al-Quran menjelaskan

proses penciptaan manusia sebagaimana maksudnya: "Dan (ingatlah), ketika Tuhanmu berfirman kepada malaikat: 'Sesungguhnya Aku akan menciptakan seorang manusia daripada tanah liat kering (yang berasal) daripada lumpur hitam yang diberi bentuk.'

"Maka apabila Aku telah menyempurnakan kejadiannya dan tiupkan ke dalamnya roh daripada (ciptaan)-Ku, maka tunduklah kamu kepadanya dengan bersujud." (Surah al-Hijr, ayat 28 dan 29)

Proses perkembangan manusia seterusnya boleh dilihat melalui firman-Nya bermaksud: "Wahai sekalian manusia!

Bertakwalah kepada Tuhanmu yang telah menciptakan kamu daripada diri yang satu (Adam) dan daripadanya Allah menciptakan isterinya (Hawa) dan daripada kedua-duanya Allah membiakkan lelaki dan perempuan yang ramai..." (Surah an-Nisa, ayat 1)

Ayat berkenaan jelas menolak dan menyangkal teori evolusi Darwin yang gagal dalam pembuktianya.

Ini juga membuktikan manusia diciptakan oleh Allah dengan perencanaan yang sangat teliti.

Malah, penceritaan mengenai proses kejadian

manusia pada ayat 12 hingga 14, surah al-Mukminun turut dibuktikan melalui kajian sains.

Sesungguhnya, manusia adalah sebaik-baik kejadian-Nya seperti diterangkan pada surah at-Tin, ayat 4.

Alangkah baiknya kita sebagai manusia menerima penjelasan Pencipta berhubung kejadian kita dan kembali mematuhi segala ajaran-Nya.

Marilah kita semua tidak kira bangsa dan keturunan walau di mana saja berada di muka bumi ini untuk mentaati Dia, Tuhan yang mencipta manusia dan seluruh alam semesta.

**Penulis ialah Presiden Persatuan Cina Muslim Malaysia (MACMA) dan Profesor di UPM**